

Nunarput tamakkerlugu kommunit suleqatigalugit angerlarsimaffeqanngitsunut angerlarsimaffiugallartussanik 100-nik sanaartornissaq qulakkeeriarlugu siunnersuummik aningaasaleeriaatsimik imaqartumik kingusinnerpaamik UKA 2017-imi Naalackersuisut saqummiussinissaat pillugu Inatsisartuni aalajangiiffigisassatut siunnersuut.

(Inatsisartunut ilaasortaq Mimi Karlsen, Inuit Ataqtigiit)

Akissuteqaat

(Ineqarnermut, Sanaartornermut Attaveqaqatigiinnermullu Naalackersuisoq)

Aappassaaneerera

Naalackersuisut sinnerlugit Sanaartornermut Ataatsimiititaliaq isumaliutissiissusiaq pillugu qutsavigissavara.

Sanaartornermut Ataatsimiititaliap tunngavittut ilimagaa aningaasaleeriaasissaq angerlarsimaffinnut 100-qqissaanut innersuussutaanngitsoq kisiannili piviusumik pisariaqartinneqartut kommunit suleqatigalugit paasiniarneqassasoq. Tunngaviliusseq taanna tunngavigalugu Sanaartornermut Ataatsimiititaliap siunnersuut akuerineqartussatut innersuussutigaa.

Naalackersuisut iluaralugu malugisimavaat Sanaartornermut Ataatsimiititaliap oqaatigigaat nuna tamakkerlugu inissanik pisariaqartitsinerup paasiniarnissaanut suliarinnittoqarfinnut pilersaarutit sakkuusut pingaartut. Taamaalluni Sanaartornermut Ataatsimiititaliap akuerivaa siunissami inissanik sanaartornissap pilersaarusiorderani innuttaasut katitigaanerisa allanngoriartornera sillimaffigineqassasoq, taamalu inissat assigiinngitsunik angissusillit aamma ineqarnermut akiliutit assigiinngisitaartut pilersaarutigineqassammata.

Taamatut oqaaseqarluta Naalackersuisut siunnersuut akuerisassanngorlugu innersuussutigissavaat.